



Savaateqarfinnut inoqarfinnullu allanut nannut tikiuttut qimaatinniarsareqqaarnagit takunneqqaartumit pisarineqarsinnaalersillugit Namminnersorlutik Oqartussat nalunaarutaanni nr. 5-imi, 6. marts 2023-meersumi aalajangersakkat allangortinneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nannup pisarineqartup neqaa najukkami agguaanneqassaaq sinneralu pisaqartumut tunniunneqarsinnaalluni.

(Inatsisartunut ilaasortaq Mariane Paviasen Jensen, Inuit Ataqtigiiit)

(Siullermeerneqarnera)

Nunatta kujataani nannuttassiissutigineqartartut ukiumut sisamaasut 2025-imiit ikinnerpaamik ataavartumillu qulinngortinneqarnissaat qulakkeeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Anders Olsen, Siumut)

(Siullermeerneqarnera)

Qujanaq Inatsisartunut ilaasortanut Mariane Paviasen Jensen aamma Anders Olsen siunnersuutaannut nannunut tunngassuteqartunut.

Siullermik uannut pingaartuuvoq naqissusissallugu, inuit inuunerannik ulorianartorsiortitsinngisaannarnissarput. Imaalinngisaannassaaq, uumasumik ulorianartumik soorlu nannumik toqutsinngitsoornissarput inatsisitigut kingunissai annilaangassutiginnarlugit. Soorunami imaassanngilaq, aallaarsarisassagigut, kisiannili nannumik aallaasaqarnissaaq akuerineqartariaqarpoq, piffinnut inulinnut qanillattortunut taamaasillunilu inunnut ulorianartorsiortitsisunut. Nannumik toqutsineq soorunami piffimmi pineqartumi pisassaritneqartunut ilanngunneqartassaaq.

Kalaallit Nunaata Kujataani nannuttassat qaffanneqarnissaannut tunngatillugu, uagut Demokraatiniit tunngaviatigut tamanna ajoriffissaqartinngilarput, tamannali pissaaq ilisimatuussutsikkut aamma paasisutissat paasiuminartut tunngavigalugit. Innimigisariaqarparput, nanu ulorianartorsiortuummat, ilaatigut silaannaap allangoriartorneranik takussutissiisoq. Taamaattumik pinngitsoorata qulakkeertariaqarparput, nannuttassat amerlinerisa nunat tamalaat assuarlernerannik malitseqassanngitsoq, nunatsinnut ajoqusiisinnaasumik.

Siunnersuutit marluk tamaasa Aalisarnermut-, Piniarnermut- aamma Nunalerinermut ataatsimiititaliami suliarineqartussatut innersuuppagut.